

Oqaasiliortut ataatsimiinnerannit imaqarniliaq

Ataasinng. aggustip 15-anni 2011, nal. 10.00 Ilimmarfimmi / Oqaasileriffimmi.

Peqataasut: *Carl Chr. Olsen, Stephen Heilmann, Eva Møller Thomassen, Johannes Jerimiassen, Lotte Holm.*

Ataatsimiinnermi najuuttut: *Jerrold Sadock* aamma *Lisathe Møller Kruse.*

Oqaluuserisat:

1. Tikilluaqqusineq aamma ilisimatitsissutit

Siulittaasoq tikilluaqqusivoq, immikkullu Jerry Sadock tikiluaqqullugu oqaatigalugu Pia Jarvad, Dansk Sprog­næv­nimeersoq peqatigalugu pingasuullutik tuluttut ordbogiliassamik suliaqarnissartik pillugu maanga tikeraartoq. Ilulissani ataatsimeersuarnissamut aamma najuukkiartussasoq unnerpaa.

Ataatsimiinnermi matumani annerusumik aggustip 23.-24-anilu Nordisk Sprog­mø­deqartoqarnissaa eqqartorneqartussaavoq. Taamaattoq kingullermi ataatsimiinnerup kingorna saaffiginnissutaasarsimasut amerlanngikaluartut aamma ilisimatitsissutigineqarput:

IKIINimi sulisut Nunavumi kulturikkut suleqatigiinnermut tunngatillugu siunnersuutissaqarnersugut pillugu ataatsimeeqatiserinnissimapput. Aalajangerneqarpoq ullormik ataatsimiiffissamik nassaartoqassasoq. Siulittaasoq ilisimatitsivoq februaari qaammat Iqalunniittoqarmat Naalakkersuisoq peqatigalugu suleqatigiissutissanik nassaarsimallutik, allaffissornikkulli aaqqissuusseqqittoqarnerata kingorna suliaq uninngagallarluni.

Kalaallit Nunaata Eqqartuussiveqarfianit aamma Oqaasiliortut ataatsimeeqatiserineqarput Pinerlittaalisitsinerup Inatsisaa nutaap allannguutai pillugit akuerisamik nutserisoqarnissaa eqqartorumallugu. Aalajangerneqarpoq ullormik ataatsimiiffissamik nassaartoqassasoq.

Kommuneqarfik Sermersuumi juunip 30-anni kulturpulje *Taqqissuivik* qanoq isumaqarnersooq pillugu nassuiaasoqaaqqusisimammat nassuiaat januaarimili nassiunneqarsimasooq taakkununga ingerlateqqinneqarpoq.

Ceremonimester kalaallisut qanoq taaguuteqassanersooq radioavisimit aggustip pingajuanni apeqqutigineqarmat Oqaasiliortut siulittaasuat siunnersuutigai: *Nalliuttorsiornermik aaqqissuisooq imalt. Dronningip nalliuttorsiornermik aaqqissuisua.*

Den Nordiske Sprogkampagne Nunat Avannarliit Ministeriisa siunnersuisoqatigiannit 2010-mi 11-milu ingerlataat oktobarip 11-anni Københavnimi ataatsimeersuarnermik naggataaruteqassasoq ilisimatitsissutigineqarpoq, qulequtarineqassaaq: "Tør du? Du forstår mere, end du tror - hvis du tør". Peqataasussanut nalunaarfissaq kingulleq

aggustip 26-annut kinguartinneqarsimasoq. Tassunga tunngatillugu siulittaasup ilisimatitsissutigaa pisussaq qanimut malittarineqartoq Oqaasileriffimmit IKIINimillu. Suli kikkut najuukkiartussanersut suli aalajangerneqanngikkaluartoq, eqqartorneqarpoq atorfilittat arlaat alaatsinaatsutut peqataasinnaasoq.

2. Kingullermik ataatsimiinnermit **imaqarniliap akuerineqarnera**

Juunip qulingani ataatsimiinnermit imaqarniliatut missingersuusiat naqqinnertai ilanngullugit akuerineqarput.

3. Ilulissani **Nordisk Sprogmode**-qartitsinissaq 23.-24. august 2011

Ataatsimiinnermut iserpoq Lisathe Møller Kruse. Pisussat tullerriaarnerat februaari qaammat Oqaasiliortut allattaasa piareersarlugu aallartissimasaat ilisimatitsissutigineqarpoq. Ataatsimeersuarnermi aqutsisuusaaq Stephen Heilmann. Oqalugiartussat kikkunerinut ilisarititsissutissat paasissutissat CCO-mit Bodil Aurstadimillu piareersarneqassapput. Ilisimatitsissutigineqarpoq peqataasussat katillutik 44-uusut taakkunani 33-it avataaneersuussallutik. Taakku tunissutisiassaat suussanersut Oqaasiliortunut ilaasortanut isumaliutigeqquneqarpoq. Aningaasartuutit allattorsimaffiat aamma ilaasortanut agguanneqarpoq. 23-anni oqalugiartut arlallit saqqummiissapput, aqaguani 24-anni ullaap tungaa angalaartoqariarluni ualikkut Perorsaasunnngorniat ilinniarfianni kultureqarnermut tunngasunik oqalugiaqattaartoqassaaq kingornalu Knud Rasmussenip angerlarsimaffigisimasaa alakkarneqassalluni. 26-anni Oqaasiliortunut allatsit ataatsimiissapput.

4. **Navaruna** – atitut akuereqqullugu Oqaasiliortunut suliakkiuteqqitaq

Inuit Aqqinik Akuersisartut juunip 27-anni ataatsimiikkamik atitut akuereqqullugu qinnutigineqartoq *Navaruna* akuerinagu Tamatumunnga pissutigitinneqarpoq atermut pioreersumut Navaranamut allannngortitsinerummat. Taamaattoq naalisarnera Nava atornerqarumassagaluarpat tamanna ajornartissanagu. Tamatuma kingorna qinnuteqartoq nalunaarpoq itigartitsissutigineqartoq akueriumanagu Oqaasiliortunulu tunngaviummik isummerfigeqqullugu.

Oqaasiliortunut ilaasortat Navaruna atitut akuerisatut naatsorsuunneqartyariaqartoq aalajangerput. Akuersinermut tunngavilersuutaavoq aqqit Nunatsinneersut naggueqatittalu akornanni atornerqartut Nava-mik nagguillit allat, soorlu *Navarat*, *Navarapaluk*, *Navaranaaq*, *Navana*, *Navak*, *Navalik*, *Navagiq* aamma *Navaluk* tunngavimmigut assigimmagit. Aamma Oqaasileriffimmi Inuit Aqqinik Akuersisartut sinnerlugit misissuisarnermi paasineqarsimammat aqqup tamatuma naggiata nava-p isuma manna attakkaa: *ingerlaartoq*, *nooqattaartoq*, kalaallisullu atsiisarnermut tunngaviumut innarlernagit - runa-mik uiggiuserneqarsinnaammat.

5. **Naduk** – d-lerlugu atitut akuereqqullugu Oqaasiliortunut suliakkiuteqqitaq.

Juulip 27-anni qinnuteqartoqarpoq panini Nadummik d-lerlugu atserusullugu, naak paasitineqareeraluarluni tamanna Atsersuisarnermi ilitersuutit 2007-imeersut immik. 2-anni ima allassimasoqartoq “aqqit allattaatsit atorneqartut malittarisaat malillugit allanneqartassasut” naapertorlugu ajornartinneqartoq. Qinnuteqartup tunngavilersuutaasa ilagaat nunani allamiut eqqarsaatiginerullugit taama atseerusulluni.

Ilisimatitsissutigineqarpoq qangaanerusoq amerikarmiut nalaanni Avannersuarmi atinik nalunaarsuisarnermi d atorlugu nalunaarsuisoqartarsimasoq, s.i. Odak, Naduk il.il. Allattaasitaap atulernerani d t-p nipaasa sakkukinnerit ilagimmassuk aalajangerneqarpoq naqinneq pingaarneq t atorlugu atini atorneqartassasoq, tassa Uutaaq aamma Natuk. Tamanna sioqqullugu d-lerlugu atserneqarsimasut attatiinnarsinnaagaat akuerineqarsimavoq, kingornatigulli t kisimi atorneqassasoq.

Aalajangersakkat taakku aallaavigalugit d-lerlugu atsiinissaq Oqaasiliortut akuerinagu aalajangerput.

Apeqqut tamanna ilaasortanit annertungaatsiartumik eqqartorneqarpoq. Paatsuungasoqaaqqunagu aalajangerneqarpoq Oqaasiliortunut ilaasortat allattaasitaarnitsinnut tunuliaqutaasut annertunerusumik paasisaqarfiginissaat pingaaruteqarmat Aage Bugge aamma Erik Holtvedip atuakkiaat 1962-imeersoq: “Omkring den grønlandske retskrivning” agguaanneqassasoq.

6. Taasariaqartut allat

Ataatsimiinneq sioqqutitsiarlugu Kiistaaraq Egede Jensen “Inuulluataarneq” projektimiit sianerpoq septembarip tallimaanni Amerikamiut filmiortartut tikissasut Oqaasileriffimmilu assileerusullutik. Tamanna sulisut akornanni eqqartorneqassasoq innersuutigineqarpoq.

Siulittaasup naggataatigut ilisimatitsissutigaa Stephen Heilmann aqaguagu 70-iliissasoq Oqaasiliortuninngaanniillu tunissutisiumaartoq.

Inussiarnersumik inuulluqqusilluta

Carl Chr. Olsen
Siulittaasoq

Nuka Møller
Allatsi